


HYMENOCALLIS (PANCRATIUM) BORSKIANA NOBIS.

NOVA SPECIES AMARYLLIDEARUM HORTI ACADEMICI
LUGDUNO-BATAVI.



H. scapo bipedali, compresso; umbellis multifloris, floribus sessilibus; foliis longissime petiolatis, elliptico-ovatis, acuminatis; spathis reflexis; corollae tubo ejusdem lamina fere duplo longiore; perigonii laciniis linearibus, corona integerrima quadruplo longioribus, reflexis.

Descriptio. Bulbus subglobosus, ubi folia exoriantur subcompressus, pugni fere magnitudinem habens. Folia cum petiolo 2-2½ pedalia, 20 cent. lata; petioli 38 cent. longi, ad limbi initium 1 cent. lati, supra canaliculati, infra rotundati; limbus oblongo-ovatus, ad nervum medium canaliculatus, ad dorsum carinatus, basi attenuatus, apice brevi-acuminatus; petioli color pallide-viridis, limbi vero nitide-obscure-viridis; per longitudinem levissime subundatus, nervis lateralibus tenuioribus, in inferiore pagina pallidiore, magis conspicuis; scapus compressus, angulis ob-

tusis, foliis aequalis; spathae laciniis membranaceis, inaequalibus, albicantibus, plerisque deflexis, intermixtis membranulis aliis brevissimis ad florum singulorum bases. Umbella 7-flora, parum declinata; flores candidi, tubo corollae obtuse-trigono, fere 16 cent. longo, recto, a basi, ubi fere pennam anserinam aequat, ad faucem sensim augustato, infra viridi, tandem chloroleuco et candido; limbo corollae patente, laciniis basi unitis, singulis 9 cent. longis, linearibus, acutis, apicibus incrassatis, $\frac{1}{3}$ cent. latis, planis, patentibus, demum reflexis; corona tenuissima, pellucida, integra, margine levissime-concavo, staminifera, duo fere cent. longa, infundibuliformis; filamenta filiformia, basi quodammodo latiora, sursum attenuata, $3\frac{1}{2}$ cent. longa; antherae oblongae, versatiles, flavae, 2 cent. longae, basi subsagittatae, longitudinaliter dehiscentes; pollen oblongo-ovatum, superficie scrobiculatum, 8,13 mill. partes cent. longum, 0,06 latum, stigma capitatum; stylus crassitiei filamentorum, 20 cent. longus; germen ovato-obtuse-trigonom, lateribus medio impressis. Semina in horto non maturuerunt. Odor florum gratissimus, vanillam simulans. Habitat Americae provinciam Caracasanam prope La Guayram.

Dedit Vir Nobilissimus D. BORSKI, Ordinibus Generalibus adscriptus, Civis Patriae utilissimus, mercaturae simul et scientiae botanicae patronus. In grati animi tesseram hanc plantam Viro Nobilissimo dicavi.

Forma et habitu quodammodo ad alias Hymenocallidis species accedit, at vero ab omnibus, ni fallor, differt peculiaris omnino haecce species. Harum in

numero primaria est *Hym. Guianensis* Herb. (*Pancr. L.*), quam etiam vivam obviam habeo et florentem vidi, quaeque differt a nostra planta: petiolis et scapo brevioribus, foliis triplo minoribus, tubo corollae $\frac{1}{2}$ pedali, limbi laciniis longioribus. Hujus iconem vide in *Bot. Reg.* III, 265.

Scripsi Lugd. Bat. d. xiv.
m. Nov. 1846.

D. V.